



PERDANA  
LEADERSHIP  
FOUNDATION  
Y A Y A S A N  
KEPIMPINAN  
PERDANA

PERDANA LIBRARY  
PERDANA LEADERSHIP FOUNDATION  
NEWSPAPER CLIPPING

Newspaper	BERITA HARIAN
Date	04 JUNE 2016

# Setuju ambil lebih ramai amah Kemboja

BH - 4/6/2016

➔ Malaysia  
terima tawaran  
tambah jumlah  
pekerja dalam  
pelbagai sektor

**Oleh Magendran Rajagopal  
dan Irwan Shafrizan Ismail**  
bhnews@bh.com.my

✦ Putrajaya

**M**alaysia setuju benarkan lebih ramai warga Kemboja bekerja di negara ini, terutama sebagai pembantu rumah.

Datuk Seri Najib Razak, pada sidang media bersama Perdana Menteri Kemboja, Hun Sen, di sini semalam, berkata permintaan itu disampaikan ketika pertemuan dua hala, di Perdana Putra.

"Kemboja menyatakan minat supaya dibenarkan lebih ramai warga Kemboja bekerja di negara ini. Kita menerima tawaran itu terutama bagi pembantu rumah," Najib.

#### **Pertingkat hubungan**

Dalam pada itu, kedua-dua negara bermuafakat bagi meningkatkan hubungan perdagangan dan kerjasama ekonomi.

Najib berkata, Kemboja memberi layanan istimewa kepada pelabur Malaysia dengan pelaburan

keseluruhan di Kemboja kini berjumlah AS\$4.3 bilion (RM17.8 bilion) akan bertambah.

"Kita juga mahu mengukuhkan hubungan dalam sektor lain dan antara disyorkan Hun Sen ialah sektor pertanian terutama rantaian penghasilan dan pemasaran beras, selain industri halal, persijilan halal selain meneroka sektor pembinaan di Kemboja," katanya.

Hun Sen, yang kini dalam rangka lawatan rasmi empat hari ke Malaysia, tiba bersama isteri Bun Rany dan delegasi Rabu lalu untuk menghadiri Forum Ekonomi Dunia (WEC) Ke-25 mengenai ASEAN di Kuala Lumpur.

#### **Dua MoU dimeterai**

Kedua-dua pemimpin dan delegasi turut mengadakan mesyuarat dua hala, di mana dua memorandum persefahaman (MoU) dan satu surat hasrat dimeterai dengan disaksikan Najib serta Hun Sen.

Sementara itu, Hun Sen berharap peluang kerja bagi warga kemboja di Malaysia akan merangkumi pemindahan teknologi dan kepakaran yang boleh dimanfaatkan di Kemboja, selain meletakkan harapan tinggi terhadap bantuan Malaysia untuk memajukan industri beras di negaranya.

Beliau turut menyatakan penghargaan kepada Najib dan Kerajaan Malaysia selain berharap pelaksanaan pengeluaran makanan halal untuk rakyat Islam Kemboja dan meningkat perdagangan dalam bidang itu.